

四庫全書

集部

欽定四庫全書

集部

全蜀藝文志卷十二

詳校官內閣中書<sub>臣</sub>李采

侍讀<sub>臣</sub>孫球覆勘

總校官進士<sub>臣</sub>繆琪

校對官中書<sub>臣</sub>李荃

騰錄監生<sub>臣</sub>王焜

欽定四庫全書

全蜀藝文志卷十

明 周復俊 編

詩

學校

題石室

唐裴釗

文翁石室有儀型庠序千秋播德馨古栢尚留今日翠  
高岷猶靄舊時青人心未肯拋羶蟻弟子依前學聚螢  
更歎沱江無限水爭流祇願到滄溟

益州州學聖訓堂詩

宋何郊

益為藩捍西南隅物衆地大稱名都擇守來頒茲土政  
治人頗與他邦殊差跌一有戾條教便宜皆得行黥誅  
羣姦帖息不敢動無復弄兵覬穿窬任威或謂一時事  
立政恐非長世圖豈無達識究是否重在改作徒嗟吁  
仲翁文翁字喬孫有偉度敢決不以常文拘當官勇欲除  
弊法伊憂內惻仁心孚視人無異遠方意威刑惠政還  
相須始時歲荒力賑救坐使餓殍成完膚既而為俗思

根本其在立學陳師模大開儒庠務誨導秀民聳慕紛  
來趣遂言謂署鴻生職使演經傳傳諸徒奏函一上聞  
法座詔劄即日來諧俞詔云信汝辦治蜀緩任威罰先  
文儒公心感激侈上賜刻在金石尊神謨覆之大廈勝  
美稱日久傳者期無渝邦人承風為盛事觀者填道來  
于于嗟嗟多士其聽命勿即邪徑安夷涂師無訛聖生  
率教信尚姬孔尊唐虞施之鄉黨勵雅俗仁誼得以相  
持扶漢皇初始盛文學起自蜀國行中區本朝教化視

三代建元安可為齊驅吾君訓辭諭萬里義均盤誥茲  
宣敷吾守教本樹一國學盛洙泗相涵濡臣謀君從協  
大義聖哲唱和真同符欲歌盛節示萬古才不逮志嗟  
其愚

復修府學故事

韓絳

文翁石室已千秋世有興衰化自流賢雋相望承學粹  
朝廷繇此得人優蜀中名士布在顯要太平典禮當傳習盛際文  
章正講求師友琢磨期不勸岷峨秀氣與雲浮

過府學遂謁文公堂

喻汝礪

閒花致幽隱高槐泛輕涼各誇一時好披風互低昂詎  
知五月中微陰忽催黃我行魯侯宮獨謁文翁堂若人  
骨已朽道在斯不亡遂令蜀文章照耀日月傍世事俱  
腐臭斯文真久長靡顏能幾時蕭條翳墟荒富貴豈不  
好千載同一傷三歎過泮宮撫已涕自滂

府學十詠

李石

禮殿

漢人祀周公為先師故鍾會記云周公禮殿范蜀公鎮云屋制甚古非近世所為秦漢以來有也內翰王素云其屋制絕異今制後之葺者惜其古不敢改作蜀侯作類錦水湄先聖先師同此室巍然夫子據此座殿以周公名自昔聖人兩兩如一家均是周人先後出東家想見中夜夢猶與公孫同袞焉斯文授受乃闢天不為漢唐加損益我時來視俎豆事重是漢人斤斧迹漢宮制度九天上散落人間此其一多因豐屋起我心



獨此數椽綿歲歷規摹嶻嶭東魯似氣象縹緲西岷敵  
竹松猶是斯干詩風雨方知隆棟吉雖然漢獻來至今  
閱時已多駒過隙中間豈無烏鼠慮妙斲不知難輒易  
工師不揆亂如麻敢向殿門言匠石詩書譬彼尚闕文  
後學如何補遺逸祖龍非意竊登牀科蚪有心來穴壁  
舊章僅在命如絲誰勒吾詩勝丹漆

石室

漢孝景時太守文翁始作石室西為文翁稍南為高

朕比文翁石室差大皆有石像朕或為勝宋溫之璋  
洗石以辨之乃朕字也

詩稟切

蜀守席口奏秩文翁高

朕于祀典竊疑二室者蜀人所以祠二公之意非必

自作

來為人所愛去為人所思君看文與高慈惠蜀之師至  
今窟中像凜凜建立時知非伯有室定是桐鄉祠蜀人  
愛二公家奉戶祝之昆池幾灰劫阿房一炬炊保此歲  
崢嶸不動山四維無為炫金碧瞻拜欽光儀祠前二古

栢外乾中不萎勿作剪伐想恐是神明遺森森勢直上  
莪冠劔拄頤烈士不平氣好在淮西碑

殿柱記

范蜀公云其柱鍾會隸書刻其上按會與鄧艾同入  
蜀在咸熙元年甲申距漢獻興平元年甲戌凡七十  
一年矣艾蓋追文翁高君之美而書也

蒼龍甲戌歲修築周公殿文翁至高君學校已再變順  
考興平年寔紀漢之獻或云鍾會書入木字隱見自獻

而至會朔歷斗杓轉會初入蜀時意不止弱禪有如猿  
猱繫百巧欲伺便殺女不作難机鋒劇刀箭會書固出  
繇家法素所善至學艾筆跡暮夜走郵傳老昭豈易欺  
真偽猝難辨欺昭爾尚可蜀士多秀彥當其下筆時寧  
不愧顏面雖蒙黼藻文不揜糞土賤周公儻有靈白日

下雷電

鍾會善學人筆跡鄧艾書  
以誑司馬昭昭遂殺艾

左右生題名

漢陽江陽寧蜀遂寧晉原以晉  
志攷之江陽蜀置漢陽寧蜀遂

寧晉原皆是宣  
武平蜀後置

范蜀公云西漢時諸生姓名文學祭酒典學從事各一人司儀主事各一人左生七十三人右生三十人可攷者僅百許人亦載于歐陽文忠公集古錄

蜀地雖遠天之涯蜀人只隔一水巴自從文翁建此學此俗化為齊魯家類林春風桑椹熟集鼓坎坎聞晨撾諸生堂與分左右相比以立如排衙九牧之金充歲貢搜出精鑛遺其沙卿雲褒武皆蜀秀虎豹各自雄鬚牙兩京得人廣數路忍使丘中留子嗟不然題名百許輩

無一顯者何謂耶我亦典學老從事試向坐中尋孟嘉  
庾亮版孟嘉為勸學從事亮正旦大會人士率多時彥  
褚裒問亮江州有孟嘉其人何在亮云在坐卿且自覓  
今左右生有典學從事意亦嘉所官也

禮殿晉人畫

耆舊傳云西晉太康中益州刺史張收畫而東晉王  
右軍已有書問蜀守事知有漢時講堂在知畫三皇  
五帝以來人物精妙畫闕因摹取得廣異聞則疑  
非收輩所書耳然畫之後前闕可攷則當以收為

正嘉祐中王素命摹寫為七卷總

關

五十五人為

成都禮殿聖賢圖蜀守席益又嘗摹

關

位可

別識者一百六十八人于石經堂

又按元豐關圖畫見聞誌云漢

文翁學堂在益州昔經頽廢聖賢之像及瑞物于壁未知孰是與者舊傳小異

繕立圖畫古人

成都名畫窟所至妙宮墻風流五代餘軌躅參隋唐其

間禮殿晉畫為鼻祖未數後來鴻鴈行畫者果誰歟或

云名收人姓張右軍問蜀守墨帖來縑緗乃知前輩人

不愛時世粧范瓊杜措李懷哀仙荒佛怪駟喝雷電筆

意窺渺茫不若收所畫上自皮羽之服下至垂衣裳盤  
古衆支派帝霸皇與王君臣分聖賢有如虎豹龍鳳殊  
文章視之若有見日月星象空中垂耿光聽之如有聞  
衡牙玉佩鳴以鏘三古以降歷今世視聽所感猶一堂  
乃知此畫自神品碌碌餘子非所望吾道久已屈二氏  
爭頡頏豈唯收也見絀餘子下尚有公議老我雙鬢蒼

齊人畫禮器

齊永明十年刺史劉悛畫殿壁器服如三禮圖席並



模本于石經堂

悛或作悛或闕劉悛弟闕之筆今闕矣

漆器侈初俗長袖

闕

都城如何古邃殿天開垂日星奇

奇與怪怪懍懍不識名我嘗此

闕

自齊永明人間

無備物未易窮丹青一作因郊丘盛禮嚴天庭

闕

異數于此集大成仰瞻萬乘聖遠想三代英蟻蟲容著

足

闕

績西歸放天梅釣天夢初醒心焉感此畫

眼角泣欲零所

闕

蜀都問君平

黃荃畫屏

屏已失其左右二屏獨中一山水屏在耳石到官驗  
問所失月日申府蓋紹興三十年三月二十九日府  
下兵馬司捕賊不獲

阿荃千頃本曾中學道分明畫手同筆削來追麟獲後  
丹青為洗馬羣空登堂欲與修遺履穴戶何由返大弓  
尚有滄溟垂素壁莫教蠅誤汚屏風

古栢二首

東坡先生送家安國教授成都云蒼苔高朕室古栢

文翁庭事具成都古今記趙次公詳其事于東坡詩  
注有妄人請于府恐壞屋欲去之石曰屋壞可修此  
栢不可復且祠廟古跡林木條禁甚明併舉東坡栢  
堂詩爭之得全

驕榮落盡雪霜浮偃蹇空貽社櫟羞濡沫東家雖借潤  
風煙西爽亦宜秋皮災已覺神明露心在猶懷剪伐憂  
鐵鎖何當絆龍脚夜深雷雨起潭湫

石欲作鐵索絆之  
以防風雨之暴未

果僅能累石  
作籠固其足

思人誰復念婆婆窰室崖陰未易磨四十圍間看溜雨  
三千年後數恒河不堪與世供狙棧尚許遺民占鳥窠  
從此便名夫子樹康人斤斧奈予何監者王朝辨進士  
年八十餘矣學官  
憫其老不  
忍易之

### 秦城二絕

張儀司馬錯所築自錯入蜀秦惠公乙巳歲至皇宋  
紹興壬午一千四百七十八年雖頽圯所存如崖壁峭  
立亦學舍一奇觀也

泮林堂後面崢嶸不道詩書恨未平瓜蔓深坑餘鬼哭  
此間學校倚秦城

塹成雉堞繞蠶叢漢棧分明蜀徼通只說金牛能誑客  
巴輸巴粟到關中

石經室

偽蜀廣政七年其相毋丘喬按雍都舊本九經命平  
泉令張德釗書而刻諸石是歲實晉開運甲辰也蜀  
守胡宗愈作堂以貯石經席益增葺為記

我今來登石經堂從以諸生行兩廡諸生讀經半頭白  
問以始終箝不語我聞此經昔中都中郎所隸乃其祖  
邇來離亂已亡失楷本僅能傳蜀土蜀土閏位無足道  
獨此仍為盛時取為將嚴鑄守重扃護以繚垣崇邃宇  
列之學宮豈無意豈但闕文存夏五大開明鏡別妍媸  
時扣洪鐘諧律呂後生不復事丹鉛抵死唯知守藤楮  
字音隨口妄蜺霓點畫分毫謬魯日月當天空委照  
盲俗相欺紛莫覩石經雖古奈爾何人競傳今不傳古

行行矧肯揆眼覩蘇剝苔封費撐拄堅鑿僅免飽蟬魚  
隘道爭來宅狐鼠此間鄒人儻借問為問石經誰是主  
一昨敵門肆訶斥幾度向牆誇偃僂登登閣閣隱金槌  
聒耳散空垂電雨蠟薰煤染連作卷玉軸錦裝如束杵  
豈無一物媚權豪幾紙才堪博圭組爾之所得固么麼  
我則何由寬擊拊一槌只作一字訛訛至萬千那復數  
石經之害此其大縱有鬼神那可禦憶昔嘗為博士官  
首善堂中容接武心知不是世間書雲漢森然城百堵

恢恢帝所有餘地忍使石經留外府便當連舸下瞿塘  
飛上三山如挿羽縑緗舛謬鐘鼎暗天罇豈容無一補  
巍巍玉帝殿中央河洛東西翼龍虎雖然斯文屬興廢  
帝既有心天亦許作詩未用擬韓公考篆庶幾追石鼓

雲安監勸學詩

并序

王日暈

湯谿之濱編戶千數百家雲安監在焉其山岌而高  
蹲踞相揖環合四面其谿洪且遠清甘湛碧縈回曲  
折皆秀美也紹興己卯歲八月潼川王日暈捧檄而



來周覽氣象因謂知監程公曰予聞山深而猛獸藏  
水廣而巨魚游地靈則人傑出蓋理之常也觀茲氣  
象必有當世聞人者出焉程公曰唐之季有希玄者  
官至上柱國偽蜀時有演遜者仕為侍郎皆幸氏予  
曰予言豈不信哉程公曰雖然自是賢能之書亦幾  
絕矣予曰百步之內必有茂草豈有數萬家而無一  
賢一能之可書者邪非父兄不能教子弟則子弟不  
能從父兄之教矣程公曰此地有三牛馬嶺二山舊

傳三牛對馬嶺不出貴人只出井土人用是不以仕  
進為業唯貨利之從意者非山川所宜雖皓首窮經  
無益矣予曰此誰氏語邪程公曰按石刻漢廷尉扶  
嘉之語嘉母媪遇龍而娠嘉故其言人信之予不覺  
喟然曰傳者既誤載諸石者尤識之淺也其言鄙俚  
如是可傳以為信邪且廷尉既生于靈異亦必賢哲  
之士安得鄙俚之言哉蓋田夫野老之言後世指以  
為嘉言非也使其言而可信則幸氏二人得生此土

邪斯民不知前賢之慕而惟俚言之信則亦記諸石者罪矣君子不言則已苟有言焉必將有補于世今以鄙俚之言為賢哲之言誣賢哲之言塞人才之路吾知斯人必無後也且蜀之東有鹽泉縣今隸綿州而初隸梓州見國史亦鹽監之類也有射策為天下第一者曰蘇易簡蜀之西仙井監地曰三峒亦三牛之類也亦有射策為天下第一者曰何臬二人皆至宰相又仙井鹹泉所出尤多而貴人亦尤多至今顯

宦名儒相繼不絕豈謂井之所出則無貴者出邪程  
公曰然願書之資以為訓予曰石刻之傳不廢則湯  
谿之士不振予其可以不敏辭哉然仕者亦不可不  
勉凡人之學所以修身而已非先期于必貴而後學  
也誠能修其天爵則人雖不從不失為君子豈可以  
貴不可必而遂至于不學是惑矣楊子曰人而不學  
雖無憂如禽何且夫地之美者嘉禾而農事不至則  
禾不生山川雖秀而士不知學則貴人不出公須廣

諭而勸之俾父詔其子兄詔其弟捨錐刀之末利其  
高大于門閭為子弟者從父兄之教勿荒于嬉勿詭  
于隨隆師親友雖遠不憚博學力文始終不輟則磨  
以歲月必有英才儒士為時而出中才者亦必能取  
科第邀富貴貪利之風為衣冠之俗矣程公曰諾乃  
退而為詩四十韻其詩曰

觀風至雲安古者湯谿濱無地不鹽烟無民不樵薪士  
子獨希少錐刀事艱辛我因公檄來暇日聊咨詢谿山

秀且清湛碧高嶙峋衣冠杳不報敢問夫何因盛言漢  
廷尉有語貽鄉鄰三牛對馬嶺有井無貴人斯言既篤  
信詩禮不復聞我聞為咨嗟此語深非仁儒風一旦掃  
有甚遭澆焚因言廷尉者其生豈不神既稟神靈姿靈  
非賢聖倫安得鄙俚語千載愚斯民斯民有幸氏貴豈  
無足稱唐室上柱國偽蜀掌絲綸遺誥尚可考苗裔亦  
說說後生宜可畏况逢堯舜辰如何二百年自棄甘煨  
塵前賢不知慕俚語常書紳不知非格言野老相因循

為言聽我語蜀民初頑嚚文翁為益州化蜀與維新英  
才出王馬繼世揚子雲詞章耀當世至今藹清芬自爾  
吾蜀士文學多彬彬乃知湯谿上未必無國珍珠磨始  
成器匪即為荆榛我雖非文翁志使風俗淳亦非好辨  
者示勸聊諄諄公侯寧有種自致唯斯文獨學乃孤陋  
師友須隆親又當聽我語既學須能勤不勤如不學勤  
學始成身窮兮世巨儒達兮為名臣唯患學不至學必  
無沉淪如不學為名不如復煎熏十室有忠信見者希

能遵會觀積歲後俊造來閭閻一成詩禮鄉觀光為國

賓

泮林釋奠偶緣攝事遂獲充員竊觀禮文樂奏  
之盛不勝欣歎輒成小詩奉呈僚友

陳邕

春丁逢上日方中洎吉修誠薦泮宮奠璧米璘誠可格  
代庖越俎數徒充八音合奏東南少一道相傳今古同  
我輩因文須識本浴沂好詠舞雩風



夔州試院呈諸公二首

冉居常

它年蟲篆老書生，謬向文闈預領衡。  
敢使靈鼈嗟屬鼻，祇愁洼馬賦崢嶸。  
舊傳錦樣心雖愧，新揀沙金眼自明。  
收拾美莊逃謗去，升沉脚跡任諸英。

粉袍切勿笑冬烘，且踏燒殘鼠尾蹤。  
總是炎蒸同造榜，

某舊以六月薦

不妨衣鉢繼登庸。  
雲移白帝鵬霄近，月入清秋

桂子濃，願得辭鋒倚天劍，借君雷雨化蛟龍。

次韻盧彥德學宮詩

楊輔

頗怪諸生籍奉常寂寥科目歲年長只今五桂名猶在  
恐有孤桐曲未忘學校規模新壯觀江山意氣久徊翔  
分光盧使青瑤句收拾風霆喚阿香

漢太常員猶  
今貢禮部耳

全蜀藝文志卷十

欽定四庫全書

全蜀藝文志卷十一

明 周復俊 編

詩

陵廟

謁先主廟

唐杜甫

慘澹風雲會乘時各有人力侷分社稷志屈偃經綸復  
漢留長策中原仗老臣雜耕心未已嘔血事酸辛霸氣  
西南歌雄圖歷數屯錦江元過楚劔閣復通秦舊俗存

祠廟空山泣鬼神  
虛簷交鳥道  
枯木半龍鱗  
竹送清溪月  
苔移玉座春  
閭閻兒女換歌舞  
歲時新絕域  
歸舟遠荒城  
繫馬頻如何對搖落  
況乃久風塵  
孰與關張並  
功臨耿鄧親  
應天才不小  
得士契無鄰  
遲暮堪帷幄  
飄零且釣緡  
向來憂國淚  
寂寂洒衣巾

蜀相

丞相祠堂何處尋  
錦官城外柏森森  
映階碧草自春色  
隔葉黃鸝空好音  
三顧頻煩天下計  
兩朝開濟老臣心

出師未捷身先死長使英雄淚滿襟

蜀先主廟

漢末謠黃牛白腹五銖當復

劉禹錫

天下英雄氣千秋尚凜然勢分三足鼎業復五銖錢得相能開國生兒不象賢淒涼蜀故妓來舞魏宮前

謁先主廟絕句三首

張儼

投順繼皇業并吞勢由己天命屈雄圖誰歌大風起得股肱賢明能以竒用兵何事傷客情何人居帝京  
雄名垂竹帛荒陵壓阡陌終古更何聞悲風入松柏

武侯廟

武少儀

執簡焚香入廟門武侯神像儼如存因機定蜀延衰漢  
以計連吳振弱孫欲盡智能傾僭盜善持忠節輔庸昏  
宣王請戰貽巾幗始見才吞亦氣吞

祠祭畢題臨淮公舊碑

楊嗣復

臨淮公武元衡也元和初元衡鎮蜀嗣復為節度推  
官後二十七年嗣復鎮蜀時大和九年也汝士為東  
川節度使故相唱和汝士曾為蜀帥段文昌掌管也

齋莊修祀事旌旆出郊闈  
雜草軒墀狹塗墼楮堊新  
謀猷期作聖風俗奉為神  
酌酒成均澤持兵列偶人  
非才膺寵任異代揖芳塵  
况是平津客碑前淚滿巾

和

楊汝士

古柏森然地修嚴蜀相祠  
一過榮異代三顧盛當時  
功德流何遠馨香薦未衰  
敬名探國志飾像慰毗思  
昔謁從征蓋今聞擁信旗  
固宜光寵下有淚刻前碑

巫山廟

崔塗

雙黛儼如嘯應傷故國春江山非舊主雲雨是前身夢  
覺傳詞客靈猶福楚人不知千載後何處又為神

題濟順王祠

在劍州

王鐸

廣明二年僖宗幸蜀神有陰兵助順見形於桔柏津  
帝幸其廟解劍贈神

盛唐聖主解青萍欲掘新封濟順名夜雨龍拋三尺匣  
春雲鳳入九重城劍門喜氣隨龍動玉壘韶光待賊平  
為報山東諸將相格天勲業賴陰兵



謁江瀆廟

宋喻汝礪

坤軸東南傾大江日夜注前驅下洛洙餘濤略吳楚任  
勢不期勞得意緣所遇水也初無營神哉亮誰主芳蘭  
沉清華碧藻舒翠縷晨鵠戲野岼春鳧集深渚均是得  
所安而神豈私汝古來幾精魄恰此迷所處滛遊不知  
還沙村失煙樹而我後千載悠然在江滸抱嗇貴無覲  
於名忌多取冥冥掠岸風滛滛打船雨舞雪窺洪濤開  
蘋渡前浦再拜謝神况聊復隨所住

題先主廟

晁公遡

天地收霸氣丘原餘闕宮野人相指似旁有若堂封當  
時大耳兒甚似隆準公夫豈忘故都崎嶇巴蜀中劃然  
成三分正爾阨兩雄武侯抱遺恨秦隴竟莫通獨怜晉  
昌明千載時始逢坐看永嘉亂蕭條河洛空

拜張忠定公祠二十韵

陸游

張公世外人與蜀偶有緣天將靖蜀亂生公在人間厥  
初大盜興樂禍迭相旋天子輟玉食貴臣擁戎旃生殺

出喜怒死者常差肩公曰此何哉從之吾欺天河流觸  
地軸砥柱屹不遷脅從盡縱捨飛章交帝前上意竟開  
悟至仁勝免殘貴臣不極賞追還黜其權安危關社稷  
豈惟蜀民全後來有阿童握兵事開邊晚策睦州功上  
公珥金蟬勢張不可禦北鄉挑幽燕神京遂丘墟迄今  
天步艱時無忠定公孰能折其姦我來拜遺祠喬木含  
蒼煙死者不可作愀然哀涕潛憤切感虜禍慷慨異公  
賢春秋送迎神誰為歌此篇

謁白帝廟

張俞

孤山扞江口上有白帝祠橫視天下險萬流皆俯窺古  
殿鎖神物悲風出陰帷天昏瓦棟折狐鼠亦生威優巫  
日鼓舞鬼怪爭奔馳雷霆卷蛟窟電火燒松枝入戶精  
鬼動有如陰兵隨吁哉漢盜亂海內遂崩離赤龍始潛  
躍逐鹿過秦時公孫奮神劔定蜀圖安危隴坻開北戶  
荆門啓東陞長驅百萬衆日闢天下師羣豪插羽翼與  
漢爭雄雌兩帝不並立興亡良可悲天運雖有在聖賢

豈無為昭皇攬英傑襲軌奄重基

先主武侯

風雲共浩蕩千

古餘寒碑威神竟不沒萬里震南夷

題白帝廟

元不伐

京兆元不伐以言罷益昌郡守詣詔獄於鄂渚紹  
興戊辰五月初八日艤舟瞿塘關下不獨有象馬  
之戒水高灑瀕者二十丈道款白帝祠因告之  
曰不伐若蠹國虐民貪墨黷貨必見嗇于波神  
苟忠義是依又何懼焉遂絕維東駛七百里曉

泊黃牛漑盡三峽之險明年春復西泝追賦是詩以  
報神休

楚山中到三峽開長江浩浩從西來齋淪巨浸吞萬派  
灩澦傑立高崔嵬鯨波回薄山羊角灘名征輦摻疊鳴春

雷蹴石岩壁勢益狠怒濤駭浪爭喧飀舟師絕叫不容  
瞬風蒲孰敢施檣桅龍驤蒙衝量萬斛梢瀆擊旋如枯  
荻昔聞有神司正直江潭祠宇留山隈羞宰醜學薦誠  
懇幽鑒冀蒙神所哀跋拖鼓檝駛東鷺忽忽已過巫陽

臺巴微炎瘴晝如霧煬燁赫日昏風霾歛然晴皎射峭  
壁翠光冶灑無纖埃連娟嵐光落衣袂飛雲容與風颺  
颺祝融之祥古亦有神之報與良豐哉嗟余陷穽豈無  
謂九死寧知禍有胎觸機直前靡顧後壬人資以成嫌  
猜燎原之勢既炎烈垂涎膏血如狼豺盼刀陰顧肆舞  
勇脅肩媚笑如詼俳違道好徑躐禁索盡網異議為梯  
媒旋踵已為鬼闌室俄驚白骨到蒼苔人勝自時天亦  
定胼蠻踈網常恢恢險夷百折堅一節君恩曠蕩天昭

回

白帝廟

白帝廟神舊傳以為公孫氏以余考之非也公孫氏  
享國日淺轍迹未嘗至夔獨遣田戎任滿戍江關岑  
彭入江關不復為戍守公孫氏無從廟食按酈道元  
注水經瞿塘灘上有神廟甚靈刺史二千石過其下  
不敢伐鼓鳴角恐致風雨舟人上水以布裹篙足不  
令觸石有聲蓋不謂其神為公孫氏瞿塘天下至險



必有神物司之但有廟偶連白帝城俗遂從而訛爾  
余往來三峽皆托神之庇輒為賦此庶來者有所考  
云淳熙十一年正月晦日西蜀楊安誠道父書

蜀江萬壑俱東奔瞿塘喧阗爭一門驚濤駭浪建瓴下  
巔崖仆谷相吐吞朋妖窟宅恃幽阻正晝噴薄陰霾昏  
靈宮奕奕鎮地險衆瀆稟令川祇尊赤甲後聳黃熊躍  
灑瀨前峙青猿蹲舳艫銜尾下吳楚約束蛟鰐如鷄豚  
舊傳鼓角致雨電裏篙不觸撐舟痕綜理脉絡盡西徼

帝假之柄攸司存子陽祚國十年近此地未省東其轅  
連江列炬鐵鑠斷戎滿犇北無留屯江關回首盡漢幟  
遺黎何自知公孫血食漢代定不爾但有故壘山之樊  
子美誤信齊東語感慨勇略招英魂山川之靈載望秩  
僭偽詎可同時論向來名實久淆溷薦裸無乃瀆俎膳  
請從酈元為考証神理昭昭斯可原

白帝祠

冉居常

西南割據幾何年長托威靈灑瀕前霸氣不垂天數盡

神祠猶壓地形偏  
舟航歲晚方孤客  
關塞山寒更暮煙  
欲論興亡愁意緒  
持盃寂寞醉山川

武侯新祠復用前韻

王十朋

山藏古寺柏青青  
地重端因蜀相登  
沙上不聞江石轉  
人間幾見谷為陵  
龍蛇樹影搖千尺  
玉雪花枝吐萬層  
堪嘆草廬誰復顧  
淒然香火却依僧

武侯祠

張震

勲業場中託汗青  
詩書壇上復誰登  
顧廬可是依昭烈

持釣何妨屈子陵力挽狂瀾休轉石功虧累土不成層

他年一笑三生夢應愧多情碧眼僧

韋南康始生有胡僧往視之謂曰別

久亡恙乎韋氏問故荅曰武侯後身也吾往與之友故不遠而來因字之武侯見宣室志

### 經秦皇墓

魯交

祖龍何事苦東巡僊駕歸來塚草新項籍已飛三月火  
子嬰猶醉六宮春元來滄海殊無藥却是芒碭暗有人  
自古乾坤屬真主驪山山下好霑巾

### 花卿冢行

謝翱

山谷云花卿冢在丹陵之東館  
鎮至今猶有英氣血食其鄉

濕雲模糊埋秋空雨青沙白丹陵東莓苔陰陰草茸茸  
上聲云是花卿古來冢花卿舊事人所知花卿古冢知者  
誰精靈未歸白日西廟鴉啄肉枝上啼緜州拓黃魂正  
飛

孟蜀李夫人祠

前人

春荒曲薄蠶叢土屈狄歸朝辭廟主官家呼母恩許歸  
劔閣并門無處所一作淚如雨故衣升屋棺四繞出門哭子

汴州道回腸酌酒三致辭巴蜀如歸化啼鳥老身不食  
追爾魂鹵簿臨門拜上恩

過漢武陵

明劉成穆

歲暮霜殘過漢都武皇陵墓舊荒蕪不將玉匣藏天馬  
猶使金鐙照野狐賦客詞園清露盡仙翁丹竈白雲孤  
千年惟有秋風曲渭水長流啼夜鳥

全蜀藝文志卷十一

欽定四庫全書

全蜀藝文志卷十二

明 周復俊 編

詩

亭館上

臨水亭

唐閻丘均

高館基曾山微羃生花草傍對野村樹下臨車馬道清  
朗悟心術幽遐備瞻討回合峯隱雲聯綿渚縈島氣似  
滄州勝風為青春好相及盛年時無令歎衰老

滕王亭子

杜甫

君王臺榭枕巴山，萬丈丹梯尚可攀。  
春日鶯啼脩竹裏，仙家犬吠白雲間。  
清江碧石傷心麗，嫩蘂濃花滿目斑。  
人到于今歌出牧，來遊此地不知還。

題栢大兄弟山居屋壁二首

前人

叔父朱門貴，郎君玉樹高山居。  
精典籍文雅，涉風騷江漢終。  
吾老雲林得爾曹，哀絃繞白雪未與俗人操。

野屋流寒水，山籬帶薄雲。  
靜應憐虎穴，喧已去人羣。  
筆



架霑牕雨書籤映隙曛蕭蕭千里馬箇箇五花文

卜居

前人

浣花流水水西頭主人為卜林塘幽已知出郭少塵事  
更有澄江消客愁無數蜻蜓齊上下一雙鷓鴣對沉浮  
東行萬里堪乘興須向山陰上小舟

西郊

前人

時出碧鷄坊西郊向草堂市橋官柳細江路野梅香傍  
架齊書帙看題檢藥囊無人競來往踈嬾意何長

田舍

前人

田舍清江曲柴門古道傍草深迷市井地僻嬾衣裳  
柳枝枝弱枇杷樹樹香鷓鴣西日照曬翅滿漁梁

巖中丞枉駕見過

巖自東川西川勅  
令兩川都節制

前人

元戎小隊出郊坰問柳尋花到野亭川合東西瞻使節  
地分南北任流萍扁舟不獨如張翰皂帽應兼似管寧  
寂寞江天雲霧裏何人道有少微星

寄題杜二錦江野亭

嚴武

漫向江頭把釣竿，懶眠沙草愛風湍。  
莫倚善題鸚鵡賦，何須不著鷓鴣冠。  
侍腹中書籍幽時曬肘後醫方靜處  
看興發，會能馳駿馬，終須重到使君灘。

同羣公秋登琴臺

高適

古跡使人感琴臺，空寂靜然顧遺塵。  
千載如昨朝臨眺，自茲始羣賢久相邀。  
德與形神高孰知，天地遙四時何倏忽。  
六月鳴秋蜩，萬象歸白帝。平川橫赤霄，猶是對夏伏。  
幾時有涼颼，燕雀滿蒼楹。鴻鵠搏扶搖，物性各自

得我心在漁樵兀然還復醉尚握樽中瓢

揚子雲墨池

即草玄所

宋宋祁

宅廢經池在人亡墨溜乾蟾蜍兼滴破科斗共書殘蠹  
罷芸猶翠蒸餘竹自寒長楊無可問撫物費長嘆

司馬相如琴臺

前人

故臺千古恨猶對舊家山半夜鸞凰去它年駟馬還死  
憂封禪晚生愛茂陵間惟有飄飄氣仍存天地間

題琴臺

田况

西漢文章世所知相如閎麗冠當時游人不賞凌雲賦  
只說琴臺是故基

江瀆亭

宋祁

一翬掀翅壓溪隅吏事初閒此宴居斷岸有時通略約  
輕風盡日戰楫攔雲鴻送目揮絃後手板看山拄頰餘  
芰碧蒲青來更數江人多識使君旟

夏日江瀆亭小飲

前人

飛檻枕溪光歡言客徧觴暫雲消樹影驟雨發荷香辛

曰橙壑熟庖刀膾縷長蘋風如有意盈衽借浮涼

錦亭晚曠

前人

長夏宜高明緩帶散煩窘憑軒一超然目與天共盡山  
從雲端見日就林外隱風來草樹披煙生井閭近自公  
況多暇沖臆無留蘊即此可宴居何須事游軫

高亭駐眺招宮苑張端臣

前人

蜀天向臘寒未極倚檻綿睇亭臯分一萍團紅江上日  
數蓋淡白樓頭雲杯中竹葉與誰舉笛裏梅花那忍聞

願君枉步數相勞他時離緒徒紛紛

和浣花亭

葛琳

井絡西南區成都號佳麗錦城十里外物景居然異傍

縈浣花溪中開布金地杜宅歸遺址任祠載經祀

按蜀記楚

安寺乃杜甫舊宅在浣花去城十里大厯中節度使崔寧妻任氏亦居之後捨為寺人為立廟於其中每歲四

月十九日蜀人多邀樂于此

自昔歲一遊有亭久摧廢將期汎舟會

先此留旌騎弗基矧肯構後人莫予嗣冠蓋或戾止風

雨亡所庇我公至之初詎肯徇人意柅車集賓組幕天

陳燕器苟弗謀高明胡為革媮敞鳩工度材用奢儉求  
中制舉從縣官給下靡秋毫費巍然大厦成甚於折枝  
易藩條息偃暇時律清和際落成及休辰夙駕忻重詣  
羣嬉逐使轂雜處同蠶市棟宇美可觀席筵陳有次芳  
樽既罷撤綵舲爰登憩夾岸布緹帶中流喧鼓吹泝泮  
煙靄間禽魚共翔戲都人與士女疊足連帷被弄珠疑  
漢曲浮觴均洛禊曖曖日將暮熙熙衆皆醉況入武陵  
源却返塵寰世自是畢遨賞始復專民事農耕士就學



商販工居肆蜀邦生齒繁衣食良藉匱三時急耕播寸  
壤無遺棄茲焉俾暇逸所以慰勤瘁上賴天子心慎重  
坤維寄既擇適臣德來秉諸侯瑞且命太史賢出攬澄  
清轡第務廣教育孜孜布仁惠匪圖亟聚斂規規奉邦  
計和氣斯涵濡羣生皆茂遂乃躋富壽域共樂昇平治  
不才備屬僚罔補公家利蔭字幸焉依雅聲慙善繼願  
比召南篇永歌棠蔽芾

遊彌牟王氏園

文同

短笻踈籬入野扃竹煙松露滿襟清奔湍激險飛寒響  
弱蔓穿深掛晚英惜去更觀曾畫壁記來重注舊題名  
門前便是紅塵道誰肯同過洗俗纓

張少愚書院

前人

澗水浸斷橋車馬不得通飛嵐積庭礎秋蘇垂紫茸窗  
紙爛溪雨簾衣折林風主人殊未歸使我煙景空

劍州東園

前人

羣峯高擁碧嶙峋亭宇清華氣象新兩岸烟雲先向日

一林花木暗藏春  
溪明夜閣軒窗月  
風斷晴橋井邑塵  
好酒滿樽詩滿軸  
士人曾不倦行人

鹽亭縣永樂山叩雲亭

前人

長江合高峯  
爽氣左右繞  
中流望絕巘  
萬丈見木杪  
孤亭揭其上  
隱隱一拳小  
李君令茲邑  
邀我升縹緲  
是時天宇淨  
晴色洗霜曉  
萬象滿四隅  
轉盼皆可了  
神清塵氛志  
適喜猿鳥人  
生貴軒豁世  
務苦紛擾  
茲焉獲登覽  
浩思欲飛矯  
今謂亭我為  
勝絕此應少  
願子立佳號

光輝飾松蔦因名之叩雲大字榜霞表

致爽軒

趙汝愚

濃陰夾道水流渠吹盡殘花不復餘惟有范家十畝竹  
青青依舊色侵書

錦屏山暮景

喻汝礪

暝色輕煙罩郡城漁舟燈火倒觀星寒山遠水江村暮  
自在粧成水墨屏

西園辨蘭亭

呂大防

手種叢蘭對小亭辛勤為訪正嘉名終身服佩騷人宅  
舉國傳香稻子城削玉紫芽凌臘雪貫珠紅露綴春英  
若非郢客相開市幾被人言誤一生

和

李大臨

沙石香叢葉葉青却因聲誤得蟬名騷人佩處惟荆渚  
識者知來徧蜀城消得作亭滋九畹便當入室異羣英  
非逢至鑒分明說汨沒人間過此生

和

李之純

綠葉纖長間紫莖蜀人未始以蘭名有時只怪香盈室  
此日方傳譽滿城恩意和風揚馥郁光榮灑露滴清英  
庭階若不逢精鑿何異深林靜處生

萬里橋西有僧居曰聖果後瀨錦江有脩竹數  
千竿僧辯作亭於竹中予與諸公自橋乘舟  
泝流過之因名亭曰萬里蓋取其發源注海  
與橋名同而實異因作小詩議之

呂大防

萬里橋西萬里亭  
錦江春漲夾堤平  
挈舟直入脩篁裏  
坐聽風湍徹骨清

運司園亭詩

章發

成都轉運司園亭蓋偽蜀時權臣故宅也清曠幽靜  
隨在皆有可樂者輒為十詩粗記領略以備它日遺  
忘庶幾其詩足以省憶舊遊爾

西園

古木鬱參天  
蒼苔下封路  
幽花無時歇  
醜石終朝踞  
水

竹散清潤烟雲變晨暮何必憶山林直有山林趣

玉谿堂

堂緣水得名方沼當其後漪瀾蕩棖楠窗戶挹花柳蟲  
魚不避人鷗鷺若相友午枕夏簟涼此樂亦奚有

雪峯樓

曾構壓池塘不借亦不偏影浮綠水靜寒逗雪山色撫  
檻接修竹連簷引蒼柏注目望長安無奈濃雲隔

海棠軒



珍葩寄幽島正對孤軒植優柔自俯仰紅綠若組織合  
酣晴日曛坐久濃香逼池面淨可鑑朝霞莫澄碧

月臺

蜀地饒夜雨輕陰多蔽天見月月無幾築臺待嬋娟高  
疑桂影近俯視雲屋連顧盼已塵外欲挹瑤宮仙

翠錦亭

榎楠百尺餘排列拱簷際畏日自成陰隆冬寧減翠虛  
曠得寂理嬾癖資濃睡誰知官府中獲此沖寂味

潺玉亭

傍砌醜小渠回環是流水石蜃此珠涎清響醒人耳風  
微竹影碎月皎波光起颺爽無塵囂靜適心所喜

茅菴

竹間構圓菴所向自瀟灑珍禽弄巧舌宛是居山野嘿  
坐見真心萬緣盡虛假勿陋尋尺地茲焉息意馬

水閣

架木浮水中略約通孤島扶踈倒花影潑刺跳魚小風

月所得多經營信云巧隱几寂無人朱欄萃幽鳥

小亭

花邊一小亭雙跨清渠上規摹雖甚隘幽僻良可賞信  
依佳木陰未羨大廈廣不足延賞朋攜筇常獨往

同前

許將

尋勝偶出郭芳園路西轉鳥鳴戀故木蘭茁歸新畹質夫

新得真蘭植之坐愛花景深行倚筇枝短翳然想林木會心不

在遠

草堂俯玉谿玉谿清且幽從公暫偃息光景空夷猶浮  
雲冠員島白日回方流祇此有光碧何心崑崙洲

危樓起城陰乘高望西極列峯橫青天飛雪千里積皓  
然絕纖塵一攬無邊白莫怪頻東向上有思歸客

海棠冠蜀花此軒花尤冠紅雲簇蘂細綠水照葉亂倚  
妝宮粉聚疊綺霞光散雨淚點春風應懷上林怨

蜀地山四維益州平如掌累臺鬱臨風坐看月宵上稍  
出叢木末始發衆籟茲焉暫遊目一攬天地廣

闌干竇溜長窳窳空埃靜修林密葱翠盡得錦城景雲  
舒青青色風散蕭蕭影未為夜行人共此晝夜永

引泉注清渠潺潺漱寒玉側出閨風遲驟驚江雨速飛  
瀨乍揚白樛木細涵綠晝夜聲不止肯效楚人哭

茨茅以為菴環顧蕭然虛內樂苟自足容丈即有餘旁  
依條竹密上翳青松踈勿言此中陋中有君子居

飛閣出方池修曲見空莽偏臨花塢近平覺春波長反  
景澄餘暉夕陰帶浮爽從容觀魚樂不減遊濠上

扁然溝上亭左右相映帶修栴列翠幄長松偃高蓋地  
偏景逾寬處約志彌恭誰知坐嘯間心遊萬物外

同前

豐稷

仙山二十四境遠難遍探錦城史君園雅與雲洞參廻  
光戰一覽紫翠絕西南池映金波淨花露玉露甘

一水從何來應是崑山頂醜成綠玉池虛堂逗清影公  
退冷然賞悅心非外境魚泳陽光動鳥啼春晝永

憑眺在何許樓倚青霄端每來注心目不覺生羽翰終

籍好峯影散作銀闕攢隻履西歸客應笑空倚欄

文錦初動機晨霞欲敷照香傳雪樓濃影落玉谿倒子  
美不能賦春工一何妙惟有賞心人相逢祇微笑

石印魚在屏犀透星入角迺知明月光日用人不覺陟  
此百尺臺餘念坐消剝洞曉弦望機仙用茲可學

簷外列脩木凜凜正人氣有德必有文爛兮五色備豈  
同天韶花弄春張繡被須信輪囷材堪為萬乘器

養原在西山如玉抱精白引之落錦渠歷耳不可擇風

雨雜鳴球珠璣寫雲液恰似偃谿聲醒悟迷途客  
覆以潔白茅環以琅玕竹天籟旁鼓笙月沼對鋪玉借  
問清坐翁此外更何欲笑指博山鑪香飛栢子綠  
長虹卧松江一蒂航大河豈如此安穩無復畏風波幽  
香萃花島魚藻旨且多徙倚小欄曲月色透薜蘿  
東西對孤鶩杖屨可幽歇容光日月來映此自輝徹鱗  
木張幄翠蜃泉飛玉潔往往得意時宛在廣寒闕

同前

孫甫



外臺富園池茲焉甲西南異花間棠梅良木森梗楠飄  
飄壺中仙疊疊物外談聯毫賦新詩刻石留翠龕

華堂殿

去聲

方池雅名題玉谿南榮山色迥北牖花光低

時聞細泉鳴間或幽鳥啼深宜澹蕩人冥坐窺天倪

金穀計浩穰山水志闊契晴空倚危樓快對西山雪  
中浩氣充物外囂塵絕無事坐清吟遠岫窗中列

高軒瞰方池澄波隔鎖窗中島植竒花鮮逾濯錦江水

府集羣仙紅雲幕翠幢畫圖入禁庭榮耀知無雙

內瑞使蜀

畫圖  
以進

俗流嗜喧卑世才務高潔築臺僅喻尋清夜延明月四  
垂天幕低千里蟾光發幽人澹無事裁賦何清絕

森森棟梁材駢空翥鸞鳳危亭構其間曾不礙榱棟簷  
陰織翠紋砌溜諧清弄攤飯宜晝眠一枕華胥夢

回環引細泉泉聲漱簷底美哉智者心清通樂

去聲流水

琤琮戛鳴球浙瀝泛綠綺塵慮無由得何須洗雙耳

結茅作禪菴不卑亦不廣地占官府雄盤基才袤丈几

席供燕間松筠助蕭爽座有逍遙公虛中息塵想


小閣連雪峯憑欄恣幽玩紅接海棠洲綠對篔簹岸有時開罇罌波影侵几案何須架長虹然後冲雲漢

蕭森玉谿南小亭屹相向使華雙輅車禪境二方丈固將物理齊室隘志自廣松竹周四簷足以備幽賞

冠鰲亭 錦竹

周敦頤

紫霄峰上讀書臺深鏤雲中久不開為愛此山真酷似冠鰲他日我重來



全蜀藝文志卷十二

欽定四庫全書

集部

全蜀藝文志卷十三

詳校官內閣中書<sub>臣</sub>李采

侍讀<sub>臣</sub>孫球覆勘

總校官進士<sub>臣</sub>繆琪

校對官中書<sub>臣</sub>李荃

謄錄監生<sub>臣</sub>王焜

欽定四庫全書

全蜀藝文志卷十三

明 周復俊 編

詩

亭館下

雲溪

宋何耕

幽居定何如  
頗恨未見之  
主人向我言  
喜色融雙眉  
修篁流翠陰  
寒溪漾清漪  
鎖畧非一狀  
幽妍發餘姿  
空濛雨亦佳  
瀲灩晴更奇  
豈惟二江獨  
意恐兩蜀稀  
主人信

妙士得此固所宜天公閱好景授受各有時豈無多田  
翁偃蹇逝莫隨素交懷老蒲秀句紛珠璣安得招歸來  
為君賦清詩往者不可作後生欲何為

公與蒲大受  
為平生詩友

浮翠橋

前人

隔溪蒼翠各西東架竹為梁路始通缺月罅林凝淨綠  
斷霞明水落殘紅芒鞋步步幽深處藜杖聲聲屈曲中  
回首忽驚橋已遠冷然身御圃田風

寒碧亭

前人

憑欄日日俯清湍洗竹年年斬惡竿十頃琉璃秋色靜  
一林筴籟曉聲寒涼風有意生天末明月無邊照水端  
誰謂過清難久處愚溪元自不相安

遠色閣

前人

小小樓居著散仙淵明真趣本悠然招呼雲月欄干曲  
顧揖江山拄杖前獨鳥倦歸翻落日誰家晨爨起踈煙  
根塵應接無留礙笑殺胡僧面壁禪

假山

前人



空庭幻出小嶙峋  
假外應須別有真  
只恐話頭成兩撥  
若為融攝主和賓

蓮塘

前人

色香無比出西方  
何物妖狐號六郎  
手折一枝聊供佛

前身定是老柴桑

劉遺民為柴桑令  
在遠法師蓮社中

蘭坡

前人

蘭與高人臭味同  
含薰聊復待清風  
紛紛蕭艾毋相笑

爾輩敷榮轉眼空

世說云蘭摧蕙折  
不如蕭敷艾榮

龍淵

前人

門前大江何渺漫昔人飲牛水為乾水乾龍逝亦其理  
近在咫尺聊泥蟠魚蝦玩侮獧獧笑縱有靈怪誰當看  
德人問舍壓吾境便爾築室相遮攔坐令異類皆屏伏  
恃有此耳差少安却紆朱紱去監郡遺我守舍良獨難  
昨來過門恍如夢龍致此語催歸鞍先生不信反不笑  
謂我饒舌狂豐干

虛舟

前人

君不見江臯車馬紛相送  
巨艚戕戕船載重西南使者  
解官釀水淺著沙牽不動  
如君材具豈多得合侍明光  
參法從胡為淺瀨著虛舟  
頗肖胷中太空洞問君此意  
竟安在欲說向人誰與共  
山林鐘鼎本同轍繫岸截江  
隨所用八窗窅窅淨無塵  
一水泠泠清可弄何當抱被  
過君眠分破江天幽夜夢

忘機臺

太虛生微雲機事日夕繁  
兼忘豈不佳尚有忘者存  
稽

首老龐翁妙處希一言請觀臺上月萬古無昭昏

新都驛遠平軒

劉望之

霜晴木落送歸鞍袖手微吟此慰顏剩欲憑欄招百鳥

更煩翦樹出青山晚悲薄祿非三釜賴許清詩見一斑

軒有外氏周次  
元帥蜀時詩

看到遠平纔得恨我寧歸臥尺椽間

露香亭

王灼

北渚一帝子洛川一宓妃池有千種蓮平生所見稀纖  
穠各態度紅白爭光輝我來亭上飲夜久未忍歸翁家

採香人但愛香滿衣  
豈知清露濕團荷  
瀉珠璣

信相院水亭

馮時行

青天行月地行水  
水月相去八萬里  
天公大力誰能移  
月在水中天作底  
我心與月明作兩  
月行本在青天上  
雖云佛說我別說  
恐落衆生顛倒想  
少城城隈佛宮闕  
客哦水月僧饒舌  
三峽水寒梅花時  
起予對月賽此詩

從何使君父子遊  
墨池分韻得名字

李燾

蜀學擅天下馬王先得名簧如巧言語於道蓋小成子  
雲最後出振策思遐征斯文大一統歛使聖域清富貴  
盡在我絃冕非所榮旁皇天祿閣聊亦觀我生懷哉不  
能歸舊宅荒榛荆寂寞竟誰顧止路今莫行使君蓬萊  
仙弭節歸赤城門無俗賓客家有賢父兄慨念此耆老  
不登漢公卿臨池一尊酒尚友千載英并呼嚴與李月  
旦共細評區區可無憾彼重適我輕竭來成都市塵土  
污冠纓古人不可見見此眼自明請為懷古詩玉振而

金聲

題新繁勾氏盤溪

勾昌泰

黃塵沒車轂平地得林丘  
花木風光早陂池煙雨秋  
不彈長劍缺甘賦大刀頭  
九軌利名痼逢君應少瘳

從俗鮮所得九牛中一毛  
強牽麋鹿性要學豹龍韜  
野服顏常好晴窗首自搔  
向來誤應聘塵土污吾袍

客至輒命酌為言花已開  
青山長委髻白骨舊生苔  
不飲固癡絕能詩宜數來  
頗憂明日雨紅紫落成堆

勝簪不肯黑，浮頰故能紅。  
心寄塵埃外，春歸杖履中。  
徑松青謾設，庭草碧茸茸。  
無術繫白日，年光如轉蓬。

簡州東溪碧波亭

姚孳

賴簡池臺兩蜀誇，東溪別是一仙家。  
令人却憶康王谷，坐看珠簾濺雨花。

三峽堂二首

宋肇

林巒十里上巉巖，飛檻初憑縹緲間。  
夔子風煙依白帝，夜郎耕鑿雜烏蠻。  
砌橫亂石遙臨澗，門對高峯近帶山。



咫尺驚湍吁莫測每令遊子念江關

堂下臨澗瀕堆

初尋磴道踏雲煙漸引茅簷屋數椽  
江影動搖波面日山光隱見峽中天  
放懷罇酒憑欄客回首絃歌蕩漿船  
要與舟人同此樂移花種竹滿巖前

題三峽堂

張縝

羣山危立接雲天二水東朝會百川

關

堪輿無此壯

崔嵬踈鑿定何年千秋躍馬興亡夢一點

關

上下關

時有剛風來浩渺起余高興九霄邊

諸文賡示前 再次韻

前人

桃李層層媚遠天

闕

凌雲賦

混一長看建武年

蜀地

雖險不

闕用武其

闕

謂蜀文章擅天下凡中原有道

蜀

闕先平闕

建隆可一二考也

老去無知經世用夢歸欲問

闕

妙語驚顏懶一笑詩壇酒社邊

題三峽堂

郭明復

三峽堂前五月風吳檣蜀柁古來通山如肺附重相掩  
水似環連去不窮躍馬孤城憐倔強卧龍八陣想英雄

憑欄千載興亡事何異邯鄲一枕中

題巫山瞻華亭

鄧諫從

峻嶒玉削三千丈翠潑嵐光冷相向風含太古雲氣長  
變化溟濛紛萬象陰晴一日具四時天籟壑深虛自響  
神山娟妙擢羣叅錦繡鋪張獻竒狀蟠根積鐵匯百川  
龍矯蛟翻饒跌宕勢連三楚北開國故壘荒宮帶溪瀼  
樓臺井邑老風煙環佩清聞駐仙仗竹林風味便讀易  
久與江山為輩行鳴絃餘暇豁心眼戲著飛闌雲雨上

典明自可達壅蔽野獲又何勞草創政和民氣長似春  
景迥心平過於掌征鴻明滅志何杳黃鵠追隨意尤放  
當年李杜經行處太史銀鈎刻青嶂寶刀珠瑟出耕墾  
曲水纖腰迷草莽牢盆古隸雜秦篆飛動閒摹永平樣  
珊瑚交柯炯不蝕髣髴將軍勲業壯英雄繁盛隨流水  
時有竹枝賡牧唱孔泉文物起騷經國色明妃守孤尚  
我家峨眉紫翠間為愛竒峯甘蒟醬秋風野水憶絲尊  
擊汰夷猶理烟榜

江郊亭新成賦詩二十三韻

楊咸亨

蜀江千里東南傾，峽門橫鎖千丈鯨。吳帆蜀楫過如織，  
府主四海皆弟兄。城西門前二十里，客去當送來當迎。  
藤梢橘刺密無路，短亭四壁荒榛荆。春風淡泊酌客處，  
我陪後乘同郊行。碧油紅旆駐沙尾，連宵急雨鼓不鳴。  
元戎玉皇香案吏，俛仰茆屋無乃輕。擘山鞭石相原隰，  
釘頭瓦縫粟縷盈。偉哉幻書此奇觀，丹楹畫棟光崢嶸。  
山長波迴目力短，空濛宜雨高宜晴。危嵐滴翠染牕戶，

空江倒影翻簷甍天藏地設久相待更為佳處題佳名  
梁間橫陳大手筆龍蛇飛動鬼神驚高齋百篇子美唱  
峴首千載羊公情試呼小隊訪新館壯遊始與勝槩并  
披雲喚月星斗動放舟聞鶴天水明練光渺渺風力壯  
疊鼓西上帆東征舳艫冠蓋兩嘆息歡謠晝亂通樵聲  
元戎故是活國手山河指顧風塵清淒涼三峽小遊戲  
樸斲丹黜安足程明堂梁棟要杞梓天關石柱須公擎  
紛紛故吏萬里外燕雀行慶大廈成賦詩抵掌者誰子

夜郎野老楊咸亨

次韻

單夔

瞿唐一門江水傾羣趨激射隨奔鯨舟車冠蓋湊蜀道  
孰間張文連殷兄相逢來往問地主太守詎敢忘將迎  
白崖候館久茅蕝近即野處披榛荆屏修啓別作廬舍  
夙戒里旅遲留行有如授館及郊勞舉國定制誰先鳴  
錢唐鄙人何所似抵掌自視鴻毛輕食焉抑畏墮偷懦  
汎觀彼己同虛盈山蹊水滸肆登賞彌嗜傑閣誇崢嶸

朋從簪盍得衆雋塵譚冰釋欣初晴  
鼎新贊我築斯館棟宇不貴朱連甍  
入門便足庇風雨揭榜却借江郊名  
時哉蓮幕有嘉客落筆能令風雨驚  
聯篇累牘溢我目粲花麗藻舒我情  
人生晤合良快意胡為四美嗟難并  
日光天際發豐蔀此去可並依離明  
直排閭闔出灑灑肅肅東首歌宵征  
循崖履坦覺無阻為君留取能詩聲  
此榜與詩儻不朽此館想同江水清  
我來歲月愧銷縮整纓輯屨圖歸程  
遺名肯復計身後謹慮第虞槃水擊



始終感慨遇僚友遂事且喜相須成勉旃功業早期就  
發軔自是天衢亨

次韻何漕司小紅翠亭二首 劉士季

少陵遺蹟灑西東端的高齋在此中今日花枝弄煙雨  
前時蔬甲卧霜風

此地舊為蔬畦

根株移取他山翠跗萼輸來

別圃紅收拾陽春無盡藏夔人端說兩詩翁

苑在中巴東復東滿城春色一園中休言小小鶯花界  
也勝纖纖燕麥風舞袖卷沙空映翠晴牕磨鏡漫晞紅

葉成帷幄花成陣壯觀詩壇矍鑠翁

控巴臺詩

何異

閱武弓刀勁利留賓歌舞清妍紅映連檣燈火翠浮隔岸人煙

臺上小留歸客臺前穩繫扁舟三宿翠微閣上一程白帝城頭

次韻控巴臺詩

李訖

翠岸紅燈奇語要自江南看來多景齊雲樓下當年使

鷓鴣招回

誰道地拘偈仄須知天悶幽妍一段丹青臺閣何人淡  
掃松煙

續和漕司高齋韻

薛紱

漢嘉人

坦性渠儂嫌我真斗升誰給太倉陳悠悠江漢飄零客  
落落乾坤老病身心歷百艱彌感奮詩留千古恰清新  
高齋高處齊文焰付與傾心仰止人

紅梅閣

韓子蒼

路入君家百步香  
隔簾初試漢宮粧  
直疑夢到昭陽殿  
一簇輕鈿繞淡黃

題紅梅閣

仙女

南枝向暖北枝寒  
一種春風有兩般  
憑仗高樓莫吹笛  
大家留取倚欄看

遊草堂

陳南賓

西出秦關道路長  
岷峨東望鬱蒼蒼  
蓬萊三賦舊無敵  
同谷七歌今可傷  
茅屋秋高風瑟瑟  
布衾鐵冷雨床床

浣花溪上應回首千載令人憶草堂

賦四亭詩四章

何景明

秀地名山出晴窓疊巘羅寨帷入雲霧拂鏡影嵯峨  
仙客丹梯意樵人白石歌悠然時一眺佳色滿烟蘿

右見山

中田背北郭曲榭俯通川未羨龐公隱先知沮溺賢  
驅牛迎社日聽鳥餉春烟閑讀農書罷逍遙策杖前

右闕耕

舊種三湘岸初移千樹香柰花繁檻雪丹果壓簷霜  
裊裊裏生南國娟娟貢玉堂嘉應伯夷並高詠楚臣章

右楚頌

翠幹盤仙樹西亭烟霧中風簾自馥郁月幌共玲瓏白  
露棲雙鶴青天下八公獨同招隱曲攀望小山叢

右淮  
隱

全蜀藝文志卷十三